

沅

湘

耆

舊

集

沅湘耆舊集卷第四十一

新化鄧顯鶴湘皋編輯

鄞縣沈道寬栗仲校訂

周伯孔聖楷 六十首

聖楷字伯孔湘潭人著述甚富有湖嶽堂集楚寶
生氣錄中庸贊湘水元夷諸書伯孔與鍾伯敬友
篤其詩不脫竟陵習氣楚寶四十五卷蔡忠烈公
爲序刊甫竣而國變板燬故其書不甚行道光己
丑余從桐城李海帆方伯宗傳許得一部爲增輯
考異共一百二十七卷刊行嗣又續爲增訂凡原
書之罅漏舛互者無不彌補糾正亦談楚故者不

可少之書也伯孔之死傳聞不一或云亂兵或云
陷賊劉賓門太史曾力辨之余修楚寶時亦思作
一文爲鄉先生一雪此謗以無確然左證而止夫
古來奇士達人遭逢亂世委蛇觀變因而失足者
亦不乏人凝碧池頭之句甘露御書之碑君子哀
之然未有如伯孔所傳之甚者也竊以伯孔自負
清流斷斷自異斷不致如所傳至此常德府志存
金堡季秀才傳又引阮翁池北偶談中語續修通
志遂據此爲鐵案屏之而伯孔乃不比人數矣豈
知楚俗善謠伯孔好罵仇怨之口可以無所不至
道隱之言出於展轉傳述必有快於心而甚其辭

者豈足信乎乃若阮翁所云則親聞之王山長山
長與伯孔同鄉至交豈宜誣其死友阮翁殆隨手
誤記耳觀山長丁庵集刻於官澄海時尙存伯孔
一序其時伯孔之死久矣果有其事山長既倡言
於衆伯孔之惡亦既表襮天壤矣而猶存其文以
自穢其集山長不若是之諄也反復思維雖無赫

然左證而伯孔之不陷於賊明矣

湘潭縣志周聖
楫字伯孔湘潭

人弱冠遊京師與竟陵鍾伯敬惺善見有一夕爲
竹枝詞三十首者心不善之鍾曰能過此乎周曰
見女子語其何足煩長者乃局戶窺鏡漏三下得
百首示鍾皆穎脫妙麗明日百詩滿都中久之伯
敬趨令南還就舉子業乃繩經切傳出諸大家
取與時流競以是沈頓者十餘年將四十築湖嶽
堂於湘潭之東偏而讀書慨園接待天下名流敘
說古今傳人勝事論詩學興衰老師宿儒無敢抵

悟者聖情才激若而性專穆掩關展卷含毫凝視
闕然如靜女枯禪所纂著楚寶凡四十五卷為備
楚事也著生氣錄集明三百年舉子業因文以徵
其行也著湘水元夷若千卷為晰湘江也著中唐
贊為斷學也其詩清刻沈鬱而律九上晚梓湖嶽
堂全集自言其詩不肯涉唐以下一語其書皆已
付梓兵燹後惟楚寶存餘俱散佚

繇萬縣至梁山道中作

夜巖夔門棹晨復遵山路豈不憚馳驅明旦凜朝暮竹柏
周道旁翠映能自固溪聲婉轉之流止遞新故陟峻撫舊
蹤崎嶇成坦步卻笑蒼蒼天正爾墮雲霧

讀雪山九歌

悲來各有淚感慨豈在侖我誦九歌詩如聞落葉風古之
英雄人成算先愚蒙世事無一可險地收其功當爾養時

胸窩遠矣路窮血氣鍊不盡出語驚頑聾空名忍再誤霜
雪慎所終

硤石

自昔聞硤石已愁所歷難絕壁千仞直顧盼何多端飛鳥
不欲上予情忍獨安羸僕驅其後喘息皆在山旭日積陰
外戾氣爲之蟠雲煙雖喜憩疲勞異所觀山水亦何心處
此道路閒

虎邱

山小位置奇能令目光遠想其創始時功力因之顯謝去
雲與霞樹老陰自展石磴接層橋俯視成宛轉客來五月
中桐花香可踐遊人未及知以此閑步遣亦有踏月人不

為遊所掩終夕待歌聲用意良已淺

漁歌

幽思無盡看江水何處漁歌江上起一疊淒清愁未終幾聲斷續腸相似南天孤雁亦悲鳴不到瀟湘無此情

夏夜宿竹樓

涼意竹間有江風吹始生衆聲歸晚樹新月戀初更人靜衣香密花高露氣清捲簾秋水至孤棹想空明

同友人尋迷樓舊址

偶問隋家事安知楚客傷笑人真寂寞不古亦悲涼地廢空生路月來疑照香尋常遊女狂蔓草不成芳

歸愁

不及江帆便安能遂遠遊一身兼古寺累月滯揚州
自
有時去客非無故留遙憐兒女穉籬落弄新秋

南嶽山中夜話

古嶽生深厚孤懷不敢奇相逢羈旅意或與雲嵐知
松老
煙無媚山高虎亦慈聽泉過夜半仙佛共威儀

曉發龍江關

出關俱是客遠道意難存細雨一江夢寒花千里魂
倦遊
當此口貧住向何村歷到風波處方知舟子尊

宿上封寺

僧在高峯住關門亦見聞泉聲無近響樹老易離羣
冷合
諸巖氣晴占半夜雲莫教鐘不定常恐動蒼霞

涉江書卷第四十一
田閒踏月歸

新涼洗梧葉野水照柴門晚歲營歡笑勸農知本原不耕
真有愧爲學欲何言月在來時路秋光滿一園

訪雪

欲往看羣玉衣單悔奈何徑花封鳥下溪影照人過竹裏
聲偏積梅前香未多始知高士意庭戶任張羅

聽雪

密霰風如織淒清入夜時一鐙寒不定萬木響頻移細雨
將毋似秋聲亦可疑聽多茅屋下真覺竹樓宜

自帆園移館十二兄湖上

去辭江上月暫憇壘中身榻就湖光澹窗開竹影新是書

皆可讀何地不宜人南北徒分阮子懷范穉春

答楊修齡問衡嶽之勝

半生棲此嶽未易肯言奇峯氣雲高下泉聲樹合離遊兼
微雨好住不獨秋宜公往從茲決重來恐又遲

新月

月爾何情緒徧來照此時客如光在葉秋共影生池晚翠
能相近寒波不自持誰將弦後意一慰旅人思

青雨送酒黃翁舟中

尊酒何關雨偶因雨念翁舟寒難近市裘薄易當風不減
高年趣其如旅路窮水煙能供養倦莫掩孤篷

憩武陵溪上煮茗

煮茶思就石埽葉更依林響送千巖瀑煙分半洞陰鶴巢
丹荔近漁艇綠楊深不及崔婆井應緣醉士吟

入桃花源

雞犬能乘霧子孫長閉關千花供佛地六博賭蓬山石髓
年年服蟠桃歲歲頽偶隨顛曼倩一劫墮人間

將嫁妾

清宵幾點淚當得此周旋夢已先雲散身猶在枕邊影留
諸姊如帶結後人緣郎命從來薄非關妾使然

過友人

幾處寒塘水都吹落葉風竹橋秋雨外花徑暮煙中所謂
伊人在豈無高想同明時郊野靜相送亦從容

南嶽山中懷伯敬

自來棲隱地不獨爲登臨猿鶴存先代松杉養道心每思
君晤對如歷嶽高深何負三年意端居未出林

譚友夏自越歸晤別於錫山

衣邊秋未去霜氣自湖陰凡子吟能及皆予夢所尋分風
來往路計日合離心各指梁溪水寒煙共一深

舟夜

鄉路近愈遠歸心殊未停犯煙疑過樹趁月漸移汀水寺
鐘生定漁村網聚暝寂然悲夜永寒露溼空舫

欲取路碧泉入南嶽

及此春晴日山深花更妍路從泉影入雲在水聲邊古寺

閑魚磬芒屨戀陌阡尋常聞見盡重向五峯煙

秋陰詩和茂之遂言別

數夕應宜月其如未肯晴滿階梧影失半榻竹涼生天意
此時蕭秋懷何處明還愁江上見不是對君情

寄友

曾記君樓隱桃源止隔牆岸移秋水漲樓對晚雲涼坐到
林邊靜尋來檻外光不知相別久猶夢藕花香

五月三日謝仲玉移尊帆園

湘岸雖幽素侶稀君舟纔泊我開扉兩人握手花邀坐一
笑登堂雲在衣筆墨相推甯過厚尊罍偶乏未爲非堪酬
佳節江邊住翠竹娟娟月吐輝

江上初夏簡秋若姪

一林梅雨溼殘鶯，嶽雪消來與岸平。
止隔柴籬看自遠，無多嵐翠晚偏晴。
粥魚齋罷銷常課，筆墨香初悟此生。
襤襪咄嗟都妄想，愛君端坐寸心明。

漁仙寺

野水幽篔古寺門，蒼苔時有落花痕。
誰人解說秦時事，此地堪招漁父魂。
淩遠笛聲過別洞，微茫雨色在前村。
山僧盡日無功課，學種胡麻鑿石根。

四月八日龍君御佛閣成

佛居西土幾時生，佛閣能從此日成。
禮罷白毫千萬丈，坐餘清磬兩三聲。
溪南北放晚花盡，簾上下同秋月明。
但是

慈悲都攝入莫因微雨不關情

峴山遊吳王洞

未入山時智勇生山中微雨卻難行始知巖壑俱經濟豈
爲登臨獨勝情葉葉乍翻秋曝落溪溪漸與野雲平茶蘼
花發泉源活尋到源邊月亦明

坐鍾伯敬河房待晚涼出城訪王永啟

河身陰半閣峻嶒白恰徵涼坐始增偶話一時閑向夕幽
懷六月止如冰蟬吟古岸生喧寂月映空山甚愛憎每見
君交皆落落幾慚長嘯失孫登

常五書至始哭鍾子伯敬於寢生而友死而以師事
之禮也成二首

殘雪聞君病未痊
心祈平善落花前
江鄉去路竟如此
舊信到門成慘然
良友勸予休墮淚
哲人云萎痛無緣
此生縱使難相負
忍聽交遊說昔年

共爲天下惜文星
何獨相知失典型
力挽希聲開異代
默留無盡答高冥
門牆人避秋冬氣
墟墓全收山水靈
不讀楞嚴心已悟
再來依舊一峯青

題梅

今朝懷抱對梅開
十日奇寒念晚栽
老幹要枯方卓犖
高花未發敢疑猜
神情迥在無痕處
香韻非從不俗來
雨雪風中調護力
天於草木亦憐才

與內遊南嶽

一峯以上極高深再過一橋生古今寶露化爲秋水去松
光常與夜巖沈仙凡止隔來時路我汝相關洞裏琴羅袖
拂花香漠漠蒼然雲盡翠蕭森

楊修齡先生園

爲園負郭暫言歸天使梁山翠作圍泉石不妨經世事禽
魚亦悟哲人機溪風溪雨清懸榻荷葉荷花香惹衣數載
愧公頻寄問此時翻覺到門稀

多意

不言多憾但顰眉此意何堪令我思衣畏香薰無可著坐
嫌人近每先移歡場贈錦情恆澹俗客催歌態轉遲筆墨
偶然邀一笑看他憐妬總相宜

逆旅

峴山青未點丹楓路近衰楊興已窮每任意行千里外數
驚身在一舟中畫多積怨長如夜劍爲懷讎故倚空秋色
沈湘歸自好恥從逆旅說新豐

白郊返於南陽道中

誰肯將身試屢艱裹糧三月爲名山參猶吾楚咽喉地嵩
在中原指顧閒碑下夕陽遊子立鶴邊秋水道人閑那知
魯國棲棲者尙有迷津見往還

聞譚友夏消息

寂寞江潭不自憐舉家愁盡在君邊先資縱貶猶驚俗古
道無存乃累賢失士一時羞玉帛讀書廿載負林泉要知

通塞關天運共惜劉贇亦枉然

弔遼陽陣亡己未五月作

此日猶然棄老成血風腥雨到遼城一軍俱憾兵無氣萬
里何人哭有聲勸爾鬪懣安衆論自來鼙鼓怨昇平刀光
夜照愚民屋遠慮非愁出塞行

丁卯下第

霜氣霜華江上樓溪雲溪雨共寒流三年苦行當今日九
月傷心值暮秋鶴爲稻梁無遠唳豹思煙霧豈終留故園
若有躬耕地草屨單衫何所求

夜出章德門行牛首道中作

尙餘殘照在林間涼氣先於草際還屢憩僕夫安緩步畧

攜詩卷爲消閑水聲不涸中宵露人影能高靜處山僧臥
竹房知客至也留明月夜留關

哭妾四首

八年閨闈一身賦光影依依几研傍別久乍疑予是客開
緘方痛汝眞亡亦知有憾如通德未免多情似窈娘金鳳
翠翹能幾日新晴樓上斷人腸

羣婢爭言永訣時玉顏雕落鏡光離歡儂半枕虛名誤生
死重泉痛念遲藥餌親嘗煩大婦衣裳殉盡歎無兒可憐
一掬秋墳草癡想他年連理枝

貧賤催人屢出門綠窗春雨見嗁痕病深遠道緣何薄帶
結良宵語尙溫葬盡名花難贖死吟枯彩筆爲招魂更祈

佛力超三界生後生前誓主恩

魚磬聲中悲怨含誓將苦海一身擔楚人尙欲求遺履荆
婦安能忍墜簪寸寸斷腸埋杜若絲絲血淚點江潭白楊
風暖梨花雪自此傷心三月三

秦人洞候憲使馮元成先生

秦人洞口武陵溪不待於今路已迷一澗碧桃仙犬吠滿
林紅葉子規啼自注山中紅葉春夏不凋長松掃榻供遊偃絕壁飛流
待品題慚愧使君門下士山中猶自隔雲泥

白門留別伯敬

昔我來何日歸舟見此時砌蟲臨曉默嶺樹與秋辭處宦
原多術甘貧誰是師旅心生悔吝神聽泥榮衰葉落聲無

定霜初冷易知去當蘆荻夜還有憶君詩

到家

豈有遠行人到家相苑結本是戀鄉心怕作還鄉客

新安江暑行

溪雨欲來人氣清溪風欲上葉帆輕灘頭蘸雪篙三尺山
脚抱涼蟬一聲

德山

萬山金碧照如來古殿松陰晝不開偶爲磬聲過泐水卻
驚花鹿起蒼苔

宿已公巖

已公巖下水粼粼石老雲黃記往因一夜溪聲聽不得遊

山真愧住山人

竹枝詞

家住秦淮淮水西門前芳草綠萋萋
郎來莫打鶯哥叫妾在高樓聽馬嘶

乍晴門巷住香車綠柳紅橋是妾家
今日新妝何處去太平門外看荷花

竹戶朱門門半開聞郎亦上雨花臺
秦淮春水年年漲桃葉桃根莫渡來

馬文淵避暑石室

鑿石依山埽陣雲五溪猶說舊將軍
隔江便是桃花洞金鼓秦人似不聞

附錄湘潭劉賓門先生周伯孔辨王新城尙書也
北偶談載周伯孔爲常德知府發掘楊根
祖墓卒爲賊所殺嗟乎此與殺人放火之類何異
鄉黨自好者不爲而謂積學明理不可一世如
伯孔而竟出此乎事之有無虛實阮翁不知有
確據而書之卽今亦不能求其確據而辨之第思
國初順治己亥肇修邑乘距伯孔之歿才十餘
年耳有如此駭世倍常之事流傳豈遂極絕其
纂修爲知縣史宗堯邑人郭金臺皆端人正士以
植名教獎氣節爲務一邑之大何惜少此一
必引之入志夫人品之壞作惡之毒至受僞官發
人家止矣若云惡惡欲短或諱其事而列之此無
心肝者所爲史郭二公諒必不出此也邑志至乾
隆丙子凡五修伯孔傳尙仍史志之舊於其人品
著述褒貶至不容口直道行於三代公論定於
棺其人爲楚南所不議而以濟南遠人議之其事
爲邑乘所不傳而以偶談私書傳之當日諸君子
見聞親切信爲賢才而錄之閱數百年影響推求
斷爲大惡而擯之恐於直道公論有未可輕率從
事者偶檢瀟村詩集爲潭人秦文超所著中有讀
伯孔詩集一首云雲成久不作誰與繼希聲舉世
高其潔古人同此清煙霞應入夢冰雪自移情禾

黍秋風裏知多幽憾生秦以孝廉出宰足跡半天
下所交皆一時名士而企慕伯孔如是舉世一聯
與阮亭所載何嘗霄壤豈池北偶談可信而本邑
人詩集反不足信乎或曰出邑人王岱之口而阮
亭筆之按康熙甲辰重修邑志王亦入纂修如有
其事而告之阮亭復諱之而列其人於邑志王山
長一時名士亦不應無心肝至此謂伯孔以不屈
於賊而被殺此情理之正也既為賊官必不見殺
為賊官而肯為賊用尤不至於見殺反覆
推尋不必更求確據而其証可以立辨

邱當世世望 四十七首

世望字當世自號比丘武陵諸生有江籬館詩三
卷當世幼嘗夢遊廣寒宮渴甚索漿飲不可得大
書其壁曰天漿一滴渾難遇卻負身依碧落閒醒
而歎曰余非富貴中人矣已復夢一大寺見諸佛
授一鉢遂飄然有塵外想既隸諸生籍久之不得

舉益耽禪悅流覽百家與周伯孔交摯嘗與伯孔
同以詩質龍太常太常亦晚歲佞佛者也太常盛
稱其力挽波靡根柢性靈當世詩不附太常亦與
伯孔異趣蓋朱陵壇坵不非七子而恍園門戶實
私竟陵當世詩才力稍遜猶喜其不爲流派所囿
故所收較寬

雪後登嵩梁山

春風吹雪花四望白皓皓出門呼所知探奇暢幽抱飛巖
老蛟掣玉鱗照天矯虬枝盡瓊琢焉能辨瑤草俯視銀浪
奔一一靜且好把酒散遐矚悅遊三山島瞥見霏霞生疑
是白日杲中懷忽有會塵氛淨如掃吾欲訪安期長跪乞

仙棗

殘臘晚步

輕煙罩城郭，獨往眷林際。
斜月挂古樹，纖纖耀衣袂。
霜氣剝窮蒿，顛倒萎荒砌。
物理有銷歇，具腓隨改歲。
莫挽辛英住，轉側青陽繼。
不語念疇昔，所營竟何濟。
搔首青冥遙，徬徨起深勵。

夏日池上作

幽居傍城僻，環宅美漣漪。
高柳垂長條，深夏益離披。
小結跨池干，坐與清輝宜。
涉境意已佳，稍深情轉怡。
息機遊渾沌，把卷搜神奇。
隱几忽嗒然，此樂心獨知。
彭澤千載遙，高風邈難期。
吾亦慕寥廓，斯人良足師。

遊茅灣

新晴發佳興，眷此幽溪曲。微風吹曉嵐，層巒碧如玉。帖水鷗盡輕，沿堤草半縟。胡姬揚妙音，擎杯回巧矚。人家逼沙岸，虎落隨斷續。舉網欣得魚，頽陽照醅醖。淑景行復移，云胡甘踟促。

輓鍾伯敬

負才不在大，精詣乃成家。君詩貴清綺，往往爛春花。叔寶妙手言，惠施徒五車。仕宦豈不達，所悲有生涯。千秋名士籍，展卷動咨嗟。

山茶花墮地爲驟雨所飄泛泛若漚感而賦此

寶珠赤萬顆，半向風階委。零亂疊錦裯，猶堪藉烏几。猛溜

急飄瀉恍泛天台水
劉阮迷舊蹤玉顏能昔比
千載留餘芳依然照清泚
靈藥乞仙姝莫遣流光駛

秋夜二首

涼風響疏竹
明月中我堂不寢戀
清輝况茲秋夜長
蛩聲徹草屋
攬我東頭床
露氣稍見侵
行踐雪與霜
茫茫百端集
鬢髮日已蒼
誰能遣此懷
聊爾傾餘觴

觴罷月猶在
我歌思轉長
佳人邈天末
靜處垂明璫
我有雙龍鏡
奉君照妍芳
楚山多蔓草
零露灑難量
仰視牛與女
銀漢脉相望

雪霽見新月有感

新月如少女
嬌顏未曾舒
娟娟傍綺戶
渺渺映重閭
積雪

發光顏輕颺揚素袂含情方展訴珠斗璨明珞徘徊漢遊
晚鬱陶湘憾餘珮聲引淒瑟天碧緜雲除試問月中人此
夜寒何如

寄題九峯山

未登九峯山心知九峯狀雄槩通天轉秀色排空盪陰巖
走大石風牖開層嶂池光拒竹影泉響蒼梵唱樵斧暮逾
急塔雲靜還颺林筍斲廚供露芽淪僧餉踏遍萬松寒月
明秋一杖

九月望夜偶成

幽居罕人跡秋氣澄於水據梧傾醪醢月盪杯心裏鶴影
亂人影瘦憎瘦相倚月彩已殊妍那必月中妙

秋日寄周伯孔陶仲調二丈江夏

夕樹號辛蟬朱夏忽已換涼風吹竹窗中夜起長歎秋氣
匪足悲遠道煙塵暗思我同心人名都聚時彥予亦理輕
策遙遙涉江漢霄泥致雖殊素心終繾綣

和孫子雙雪日見簡韻

丈夫志四海風期從所好吾欽彼姝子磊砢絕時抱文藻
擔星漢腹笥羅古奧精探罔象珠秘抉渾沌竅蠟屐凌風
散紫筇踏煙嶠拂擎天花亂奇情發高調孫登君前生孤
岑隱鳳嘯余亦希阮公從遊匪云傲

月夜

露華洗明月天光淨如紙遊雲忽瑣碎龍鳥篆奇詭恍拭

金字經展向僊人儿欲讀已茫然心知真氣過

中秋夜同友人登梁山絕頂看月

深山八月天氣清山風撼樹江濤碎雲煙莽蕩失邱壑蒼
虬畫立豸猿鳴攀蘿捫石不得住微茫漸辨雲間露奇峰
倒插青天孤憑陵只許飛仙聚我登其顛披蒿萊仰面大
叫天門開玉樓銀榜看不定姮娥素女紛金羈須臾海波
喧莫測寶鏡乍懸龍子國清虛宮放白毫光不夜城裝水
晶色爾時高人興政豪清池爲酒上爲糟山靈爲我煮白
石仙娃歛下調雲璈丈夫不取黃金大於斗且吸清光倒
尊酒眼中碌碌安足數震旦茫茫無何有莫怪登山蠟屐
頻太行險絕君知否

雲作龍形明了如畫占云其下有賢人歌以紀之

辰年月午天青蒼有物挂天尾屈長玉鱗含風欲颯颯老
鬚避日猶茫茫神怪翕忽不可按化作輕煙向西散佳氣
連蜷豈盡偶帝居深嚴邈河漢野夫睇罷心忡忡疏賤那
敢窺辛工搔首虛無復誰問欲騎紫蜺驅長風

己未春寇逼東都大帥劉綎杜松死焉皆國之良也

作歌悲之

白日徒黑風霾狂機槍埽斗生怒芒萬馬躡躡堡城裂膾
人舖肝勢莫當桓桓虎臣奮出疆甲壞犀兕弓挽強決背
百戰虢敵魄杜師忽蹶軍心惶劉侯誤逼敵營邇援枹大
呼撼壁壘營門驟開虜橫突六萬義軍血成水新鬼夜向

戰場立可憐，
虎俱橫死二百年餘。
天鉞麾神武，
捷代無窮。
追卽今聖皇，
重遠畧，
猛士凋喪，
良足悲亟。
斬戎頭，
瀝斗酒，
陰風天半曠靈旗。

劉昭孫

自注：大帥紱養子也，勇敢萬人，清河之敗，突陣求其主，不得死焉。

虜鋒如蝟，
鼓聲沸壯士呼天，
血爲淚，
十突重圍，
主不得，
臙目斫，
酋首墜，
戰血橫，
餽身手碎，
肝腦盡裂，
義無退，
君不見陰風慘冽，
白日昏，
開元戰死劉昭孫。

王子雲過武陵聞其尊府君安順公訃慨焉作歌

義旗十萬探虎穴，
安順府公躬擐鐵，
斬馘羣醜如拉枯，
陸廣河邊水爲血，
毒霧黏天鷲鳥墮，
伏波驟褭壺頭革，
三軍哭聲夜震天文木，
函身封馬鬣，
公死事變夷氛惡，
壁門星

隕大旗折死兵死溺何紛然公獨全歸且甯殺公子削劊
逐歸櫬肯險出入豺虎窟痛哭誓斬狂酋頭瀝血父靈表
忠伐我作短歌相唁慰曾惡貫盈行就滅魚遊釜中豈久
存死為厲鬼必殺獨出師未捷身先死千古忠魂如一轍

按王子雲之父名追皐襲父廷瞻蔭由部郎出守
安順府奢蘭之亂勞瘁卒於軍子雲哀號伏闕請
贈恤此詩蓋送其
往安順迎父柩也

雨後看梅花

春煙散朝綠石溜洗蒼苔徑僻鳥逾寂林疏梅正開壓牆
殘雪映趁雨冷香來恍泛瓊漿飲何須更舉杯

夏雨

瑟瑟此深夏沈冥雨氣屯波光欲動市水氣不分村野哭

荒煙隔柴門白晝昏征徭方孔棘胥溺詎堪論

壬戌十一月一日作

萬衆怒摩劍千家甘棄城自焚兵所戒飛食虎難撻總統
須長策誼呼豈夜驚幸聞張制府漢幟照江明

祭石氏女墓

汝死埋幽憾無良遇彼人叫殘蕭韋月泣盡綺羅春荒塚
又青草孤魂誰白蘋一杯澆淩土不禁淚彌巾

暮雨

暮雨一何急殘花風更摧病餘思斷酒愁至轉銜杯羽檄
飛城郭徵求罄草萊那堪聞野哭慘慘暗雲隈

得伯孔書聞將過大梁有寄

秋深彌憶子搖落更何之俗薄無交道書來有夢思閣雲
寒自溼江月晚相宜欲問狂夫態青編坐日遲

夏日德山

性與空山狎來偏深夏宜幽蹤尋壑遠孤賞戀松邊竹露
清猶滴曇香靜自知坐沈煙外磬新月照來欹

陳衡靈自欽海歸攜酒過集

小隊衡門枉芳尊海國移故情添酒洽老興發春遲保障
饒公等江湖足鬢絲不嫌疏簡慣頻許細論詩

譚友夏過武陵予以村居未晤賦寄

岸溼維孤艇園霜叩草屐雄談傾稷下良晤阻尊前正始
豈今日雅詩傳昔年鍾期近淪喪誰與聽冰絃

乙丑二月聞黔中報急

近得黔中信夷凶莽未悛西兵重潰矣時蜀兵敗沒南土益騷

然轍豈禁三覆謀應貴萬全時危思壯士誰著祖生鞭

輓劉元誠司馬和兵憲尹公韻

投袂緣匡世從戎匪冀榮謀無千慮失憤激一身輕輿論
春秋定孤忠日月爭請纓計已辦好念棄繻生

送汪遺民南歸

執手河干黯不分綈袍霜冷悵離羣天風欲下衡陽雁鄉
思先飛海國雲入里詞人驚盛藻過湖龍女乞靈文桃花
遲爾春來棹預唱蘼蕪爲憶君

八日雨酌

茅堂寂歷鎖秋陰涼吹蕭蕭動夕林綠酒偏于時節好黃
花難向雨中尋登臺何客同明日搔首高天且獨吟世事
驚心凋短髮不教狂態費朋箴

袁小修歸自桃川作此奉問

詰屈煙巒幻幾叢躋攀何處躡飛虹林深定有雙鬢導界
敞懸知一綫通嵐氣染衣吹帶雨瀑泉搖雪迸隨風蒼巖
傑句劉應遍盡作芙蓉秀碧空

過居士庵作

亂竹蕭森野水連居然一室敞秋天無人能破支公理有
客來逃蘇晉禪花雨半沈疏磬外茶煙微逗曉風前維摩
髮在鳩摩婦不染淤泥法更平

寄龍大參君御先生時治兵寧武

萬里纓鞭耀積沙主恩逾渥鬢初華
烽清堡戍聞邊騎月浸營門冷塞笳
羊叔盛名宜幕府漢臣奇蹟憶靈槎
綵臺舊作驚人焰應鬪龍泉十丈花

過龍陽呈呂令君時以齋遺詔至

湖煙莽莽抱孤城匹馬衝寒駛暮征
血淚兩從先主隕黃河三爲聖人清
自注太祖世宗至今
上澄極河清者三矣淒迷橘柚含霜色
絡繹漁舸趁晚晴僊令政閒能下榻
旅亭夜酌聽江聲

花開

春檻春花作意開茅齋多致引徘徊
遊蜂趁蜜公相撲蝶尋香時一來
小出每探幽衲慣狂吟都付衆人猜
乾坤

底事紛戎馬嘯對芳叢且戀杯

辛未歲暮有懷同志

流年如矢歎蹉跎貧裏光陰草草過戎馬關心聞轉急乾
坤滿眼事仍多久逃末俗成吾癖但就新詩且自歌陶寫
老懷惟有酒醉中無奈解愁何

輓龍隱公先生

二十登壇四海聞新都吳郡許空羣方瞻帝幄咨元老忽
悼詞林失冠軍暝入荒村淒定烏霜寒野水澹斜曛平生
一掬西州淚灑向南天并作雲

投老辭榮住薜蘿名園飛構俯嚴阿家藏海嶠靈人蹟幙
隔瑤臺子夜歌只謂管絃娛謝傅何期寶瑟泣湘娥騎箕

碧落應無憾獨奈云亡殄瘁何

偕詞社集江上與朱康侯言別因悼瀛公先生白注時先

生新

數峯涼雨忽蕭蕭畫舫清江暑驟消乍喜一尊名士集卻
愁孤棹美人遙談深欲戀沙邊月夜寂偏聞水上簫回憶
瀛園觴詠處武溪哀怨不堪招

燕坐

偶爾息座念石上坐無語空檐忽有聲林梢過松鼠

睡起

唾起竹窗寂梧陰倒徑斜忽聽晴雨響滿地落榆花

野人送新瓜

沙洲老集卷第四十一
三
四月瓜新市未知筠籠提出曉煙媚涼侵齒頰醑纔半倦
寫夔州杜老詩

秋日招客飲

幽居無徑不蒼苔滿眼秋光勸舉杯風竹響催江月上露
蛩吟促砌花開

庚午秋日過龍隱公北庄遇雨有感

不過西州已數秋重來風景迥堪愁籃輿穿徑絲絲雨白

用隱公昔見贈句轉憶題詩共倚樓

沅湘耆舊集卷第四十一終

沅湘耆舊集卷第四十二

新化鄧顯鶴湘臯編輯

鄞縣沈道寬栗仲校訂

譚布衣雅 四首

雅字岑止茶陵布衣早歲嘗從瞿稼軒先生軍亦
殷頑也其弔沅州邱式耜死難詩最爲時所稱劉
杜三聞譚岑止又移寓石盤山卻寄詩有舉家眞
耐白雲寒之句可以想其風味矣

海上人日

憂天朝喜鬻飲鹵日思泉海國當人日山家記客年隔籬
田父喚藉草瓦盆傳月與斜陽並予歸鳥恰旋

海上立秋

匡山往事易驚秋忍對西風賦壯遊擁眾田橫猶伏島依
人王粲且登樓飄零家國生何益莽浪乾坤死便休盡說
窮愁詩易好慙無好句答窮愁

弔邱祈年秀才

三百年來養士優得君章布少相酬捐軀東海羞秦帝全
髮南冠殉楚囚血化漢江千頃碧氣蒸夢澤一天秋遺骸

應傍禰衡冢萬古同香鸚鵡洲

按祈年名式籽沅州諸生沅人所稱月浦園主人
玉瑯隱君之子也性慷慨抱負奇偉獻賦破常德
辰州震恐式籽聚族而謀必不令賊踰尺寸上於
是辰之豪傑倡義團練守禦賊卒不敢窺長沅以
西式籽之力居多鼎革後湖南諸郡尚未內附桂
藩稱號於粵式籽徒步行在上書授翰林院待詔

持節招諸賊會李閣部若符驍黔陽式將檄下辰
 川袞衣大帶見本朝總領徐公勇長揖語國事
 徐怒其不遜繫之械送武昌俄大兵取黔陽閣部
 不屈死并以式將事上聞世祖命宥之而式將
 不欲一息偷生為支自祭竟置重典宥之而式將
 下已無及矣事詳武陵楊農峻所作傳
 附祈年自祭文維年月日謹以汨羅之水首陽之
 薇致祭於大明招撫使邱君式將之神曰我與爾
 生長龍標之煙溪分別武昌之江夏嗚呼人生離
 別固有若是其倉猝者乎嗚呼我先有爾一有我
 是其從容者乎際昔未有我先有爾一有我爾體
 我我與爾相附而不相離者三十年於茲矣獨奈
 賦性愚樸以致今世遂忘前世事故囑爾後世無
 忘今世事家傳清白世愛國恩與爾共之未嘗悖
 也琴書一篋孤矢四方與爾共之未嘗負也祗因
 從兒型妻信友與爾共之未嘗負也祗因王氣偶
 歇元元降制庸臣諛國神州陸沈一時東南豪傑
 與民効死孤軍倡義以及楚魯吳越閒樂鳴馬怒
 者不可勝數無奈王師遠隔援兵莫及悉遭慘屠
 嗟乎未嘗不畫苦我師遠隔援兵莫及悉遭慘屠
 未忍殺戮希以三寸舌拯救爾永別乎一齊城未下
 而鄉里就烹身作俘囚竟與爾永別乎一齊城未下

兩且毋歸直至承天鳳陽紫金西山諸陵見二祖
列宗於地下訴敗亡非桀紂之君轉由鄒魯謁孔
孟之靈謝枉讀詩書之責然後返二酉歸故閭送
夢於老母告以爾我分別狀亦毋甚悲痛激切有
傷母心其兄弟妻孥煩爾轉達無須繼緒也於是
上朝金闕下達微忱陰護王師再圖恢復則果哉
共勿忘今世事矣獨憾我軀微弱無握拳透爪之
能所賴爾氣浩大有貫日回天之力量我入地而骨
香泉石爾歸天而氣壯山河我言我行爾切記之
我水我薇爾散嘗之至於老母少婦自有明主達
臣之矜恤賢兄弟之孝友不煩內顧也我方
滿正氣歌鼓稻生琴與爾唱陽關一曲可乎

贈友

羨君高翫入冥冥我尙風塵影答形無劍割開湘水綠有
囊收拾嶽峯青逢迎緣在三生石去住家浮一葉船意欲
爲僧難佛法晨昏課誦但騷經

夏秀才君憲 五首

君憲以字行湘潭縣學生少負才名與同縣周伯
孔友善著作甚多燼於兵燹僅存樂府古體五首
哀惻悽惋莫楚詩人之遺也當鍾譚盛行時伯孔
輩爭相附和君憲斷斷自異獨不染其習氣而詩
藁散佚併姓名不見方志可深慨哉

棄婦詞

墜露百草先是夕山川換簷際一螢飛照見星歷亂妾心
妾自知君行君不疑君疑不棄妾未必妾顏色好鳥下高
枝徘徊枝上翼

野雀詞

野雀卑棲炯心目踽踽野田啄野粟虞羅坐對川原肅鳥

鳶盤空伺腐肉有鳥有鳥生後先氣飽志決與周旋鳳皇
不下我安適相教二蟲慎羽翮

孤桐行

秋葉落已急出逢孤桐相與立蟲號其傍雲水泣孤桐孤
桐爾何爲矯矯百尺生原隰讀書不讀經志士終夜心生
平幾踟躕坐使白髮侵悲風兮蕭蕭日暮兮無聊撫長劍
兮欲發期所思兮遙遙

蚤發

雞唱行人起墮葉覆寒霧嗟此去來心昨迷今豈悟揮袂
易前期登頓煩屢顧羈禽難爲羣徒旅競奔鶩涼風飄素
髮起倚臨歧路方來野寺鐘幸接遙峯樹日出萬象開樵

收保貞素晴雲石上生暮雨溪聲度荆扉亦蚤開杖藜得
蹙住勞生愧世情卽事窮幽趣江流澹容與汎汎徇所務

到城

平生邱壑人又踏城南路十室九室非恂恍成一步憶昨
賊再入隄防豈無素所謀必冠蓋指畫傾百慮走馬環追
呼聞雞勒部署健鬪未盡非揚綱失所據陰風生白骨白
月淒舊戍日流江水深遙愛交陽樹人恆戒有初天行殺
則豫城高賦斂繁歲歉舟航聚良苗沒巨浸兵戈同一懼
兵戈可奈何衣食我之務猶勤廟堂詔恩重不待吐百物
仰春榮四時以回互遺氓顧封疆靜聽窮今故賤子走跋
跋泥塗誰肯顧昏妄記所識欲揖灑恐誤旅食秋夜長跋

辰風雨度仰視雲開鴻嗟此置中兔羣生各性命得不忍
朝暮默思水與賊曾未三日住

陳山人三績四首

三績字玉几零陵人崇禎時縣學廩生事母最孝
孺落有大志與陳忠潔公爲莫逆交嘗以天下爲
已任忠潔旣貴遂絕意進取餼滿當貢棄去以山
人終獻賊陷永聞山人各百方招致之逃匿萬山
中恢復後當事以抗節薦授桂林通判亦辭不赴
隱雲莊山二十餘年日以著書爲樂有易經傳義
衷康熙二十二年奉 詔求遺書當事取以應別
有參山詩集四十九卷學者稱爲參山先生

哭陳澹元先生

臣死必從君余故知之早突驚天變蹙陰陽無昏曉紛紛
誤國人塗地誰肝腦積運使傾覆戮辱如刈草祖宗久養
士獲報亦何少列星二十餘箕尾騎縹渺綱常賴以維公
於中表表留香汗簡青千載日月皎相知同寸心一哭天
荒老

雲莊山散步

濛梁魚樂處散步數峯明覓路移幽石烹茶試古鑄山空
雲有色鶯老樹無聲坐聽農談晚前林夕照生

夢忠潔公感賦

國破孤忠說楚人攀髯雲上亦楓宸燕臺夜徹雞聲杳易

水風悲戰血新滿眼江湖誰社稷傷心天地幾君臣寒宵
精魄來尋夢起視浮雲一愴神

聞變知難必死難

幾年風雨劍光橫富貴知公匪世情一死定能成一是一早
命張許待先生自注先生常語余曰人生功名不可不就非必為富貴也

吳居士道升一首

道升字應期一字聚垣先世居醴陵文定公獵齋
也後遷善化古渡遂為善化人性孝友嘗受父杖
左腕有創痕每自捫拭哀痛不勝與兄道剛弟道
行友愛甚篤道剛病肺刺血和藥以進病竟愈其
至行類此博學能文章倜儻任俠名甚著嘗為黨

事代草平播狀酬以金幣歸卽奉媮姊喜聚書多
手錄一日過長沙令鄧從吾署得真定梁尚書家
所藏手鈔耕餘博覽一百卷卽願受值手寫殆遍
其嗜學如此見高彙旃三楚文獻錄所著有管窺
草見聞筆記易義臆解諸書今不見

嶽頂偕祁陽張子隨州王子同遊

天南名勝枕江開孤賞相酬把臂來博物張華原上客能
詩王粲自奇才白雲縹渺層峯合碧水潺湲曲澗迴身世
其疑遊汗漫不妨豪舉醉霞杯

李教諭先登 二首

先登字文岸善化人由歲貢授湘鄉教諭以母老

辭歸獻賊陷長沙文岸負母逃匿幾不免母歿哀
毀孺慕教其異母弟先香子世樗皆有文行亦一
時儒碩也

响樓碑磴歌

攀响樓起長噫載陽春日是耶非碑前芳草爲誰晞美人
美人甯式微

响樓碑上莓苔積响樓碑下杜蘅碧美人美人何日歸水
遠山長總相憶

高副舉治一首

治零陵人崇禎丙子副榜治父鋟與世父鈿兄弟
六人友愛甚篤世亂山居課治兄弟皆有文譽

弔陳太僕

寶國奸諛自不死我公恥獨爲君子獄獄千尋位置身吾
戴吾頭無生理九死不悔乃盡臣冰凌石骨猶嶙峋衡獄
高高湘水碧萬里孤魂招不得

唐節士周慙

四首

周慙字穉純原名虞一零陵人崇禎朝府學生性
英偉好詠詠終日徜徉泉石間貧窶不介意也既
而與同里易康侯諸子講良知之學復徒步走麻
城謁蕭康侯蕭名繼忠鄒南臯門人留一年歸倡
同社講習萬公元吉司理永州時甚重之流氓之
亂永城陷與忠潔弟純恕倡邑義勇走粵西乞總

鎮楊國威師保鄉里郡賴以復及萬公開府虔州
復隻身往見萬喜承制拜爲郡通判委主軍餉贛
破與萬公同沈江死所存詩四首其辭較然真不
媿所學矣贛州之難與楊萬兩公同死者劉同升
孝則之外尙有彭期生觀民姚奇胤有僕黎遂球
美周諸君皆有詩集而穉純姓名獨不登紀載無
有能表章之者可慨也

秋日偕姚君揆遊浯溪

吳中有詞客懷古企先賢盤輿同我往問渡浯溪邊掀髯
一狂笑指點石上煙逢迎有山僧共立唐碑前取水拭石
鏡賢眉白炯然茅堂與竹樹隔岸影空懸誰作石鏡詩端

溪譚青蓮生動復洗鍊允是一名篇疇爲剗其名俗氣眞
堪憐青蓮爲正官或爲人所捐乃知風俗薄翹首獨問天
祁陽修邑志已爲吾師傳木壽自千載愛憎奚問焉攜手
上唐亭始廢今鮮刃三箸書其上飛動迴欲仙轉道上悟
臺石徑空洞穿瞻拜二公祠重修有數椽始歎文人力經
厄復自堅躋攀覓窳尊其量深且圓可以注十壺言之口
生涎寒影集羣峯水底雲氣旋漸過渡香橋溪流自潺湲
老樹生蒼蘚藤蘿一綫牽密葉覆積水巖日出流泉訪僧
止破寺茶飯意誠虔出門一揖別聚散若有緣錫我以尊
酒倚石成醉眠醉後渡溪歸逐步遠山連

按舜純先生死贛州之難人無知者詩亦不多見
僅從零陵志錄其哭忠潔及懷蕭石民劉拙齋三

首茲復從別本見其遊悟溪詩丞錄之詩中感及
鍾削名篇之妄致致風俗之薄與二十八卷劉子
參送唐仲亮出修涪志同
意乃知仲亮即稗純也

哭陳太僕詩

憶昔丙子秋同泛武昌船名士始獲雋南宮復先鞭銜命
按三晉督學視幽燕一朝遭國難不共賊戴天絕筆告兩
親忠孝念獨堅信心斷以理臨難無繫牽頃歲寇入永永
人危且顛惟公有季弟相與計安全公今殉大節二難光
後先義氣貫金石濂洛得真傳但願後來者努力希前賢
余不輕涕泗獨爲公漣漣

歸零懷蕭石民

巖巖清峙有忠肝深柳堂中氣吐蘭幾縷荒煙生暮色一

天微雨共春寒爲憐爾足常貽履似覩儀腸屢授餐歸後
夢魂猶未隔黃岡古壁望成丹

歸零懷劉拙齋

蕭然破壁古先生西馭邨中老氣橫蒼樹有花還有骨澄
潭能遠亦能清詩書日出消魔障壇坫風流自主盟願得
老人頤養健雪深重擬立麻城

吳山長道行 二首

道行字見可善化縣學生方七歲聞長老談嶽麓
先賢講學便蕭然傾聽指示古來忠義大節輒色
喜稍長爲諸生有聲家貧授徒以著述自見張陽
和元忭主講嶽麓時從之遊陳發良知孝弟之旨

語最親切時新建惜陰書院當事聘為山長人稱
嶠山先生獻賊犯長沙先生遁之萬山中甲申國
變鬱鬱不自得一日趨吉藩故邸望闕痛哭展拜
輿歸山中不食卒著有嶠山集易說讀史闕疑嶽
麓志諸書先生以理學鳴詩非所習今錄五言絕
句二首聊存其概

宿麓山二首

繫舟楊柳岸醉眠楊柳煙朦朧看新月疑是晚霞天
聽月到樓前搔首重延佇疏鐘何處來露滿道林樹

附錄嶠山先生自敘錄畧矣未之秋驚魂欲絕不
即阻越者不欲與亂晉淵也多方持護想見太平
甲申正月五日即攜兒輩匿影窮巖十一日聲息
頗惡更遠遁自是日移一山火無再舉迨十九日

即石宅稱定亦瞿瞿然風鶴時搖二月念一日仍
 還舊莊抵莊時虎燁深林其聲震地予笑語藹翁
 虎之世耶履亡何傳郡邑侯檄至臨撫有焉私心
 稍慰三月月初周公祖首蓋爰以十二日趨府一見
 歡甚慰勞款錫有加蓋以時波靡潰予家克自介
 全若有天幸云望後唐父母復任相見亦如之故
 廬俱焚借兒孫輩住李公祠極目焦士共仰天日
 堵公祖於四月申一到垂問進而畧相諮度不數
 旬而晉秩武昌矣一時衿氓奪所恃怙散兒亦從
 之去余送至江上惟有瞻戀殷殷耳返至中途驚
 聞北事主亡臣辱痛如之何予以諸生食恩累代
 獨非草莽之臣哉居旬日唐父母以團練鄉勇屬
 愉兒促之渡江余復念各莊荒熟不及半西成將
 及須一驗視屬懼兒訥孫輩東西去獨坐深思杞
 憂成甚無天可問有鬼相鄰烏能宴宴也十之
 心愈恇恇動十一日早起燿吉府望宮闕朝焉忠
 憤無聊亦云寄也十三日薦新先人倍覺悼痛望
 之晨炷香告天忽忽不自得明日愉懼兩兒訥孫
 輩來理生平手蹟編帙一一付之十六日早速肩
 輿將渡而西因走筆數言以志予懷十八日巳時
 筆閣而填至此從先帝於地下矣
 女羅拜從此從先帝於地下矣

附錄高彙梅先生傳論昔萬歷中吾邑顧文端公
與先伯父忠憲公講學於東林書院四方來遊者
皆知道南一脉續於梁溪時嶺山先生久為嶽麓
書院長不聞南下以所學相質豈江山遼絕限之
耶余以壬午冬較士之餘登雲麓峯返憩書院懷
朱張霽雪之遊倡明大道之盛不勝低迴留之然
則先生講習於斯其道以朱張為宗與文
端忠憲揆固一也可不謂衡湘之賢詰哉
附錄堵牧遊先生墓記畧長沙之嶽麓於嶽為距
於郡為客為賢者區藪為各景光先生當其地近
厥幽居講學於山堂志記其勝蹟而不足以竟先
生之奇畢嶽麓之事於是懷忠感賦絕筆甲申千
秋已矣先生殆以嶽麓為生死焉

唐山人九官

四首

九官字師濟一字天甯沅陵人崇禎中貢生著有

澹園詩草澹園生而岐嶷駘髀自喜讀書過目不
忘所交多奇人偉士甲申後棄冠服隱於詩自稱

澹園山人有卻聘詩見辰州府志香蕉詩話載其
題澄上人畫詩甚奇偉惜通體未稱今止存贈澄
觀詩一首近體三首皆非苟作又其時有潘亮淵
者嘗受詩法於澹園有月山堂集未見

贈澄觀上人

吾翁御史馳馬名曾彈權相馳風聲我師不合怒顏頰金
繪揮卻絕送迎御史拱立師目瞪埋輪不懼滿座驚鼎吾
公子豪氣橫文章聲氣動帝京生平肝膽向師傾珍師隻
字如玖瓊黃金揮土裘馬輕執轡高風繼信陵富兒貴介
聚如蠅爭欲延師致百繒吾師掉頭百不磨

虎谿山

高閣生幽韻登臨覽化城山增羣木秀樓納遠江明秋色
如僧靜閒雲似客行孤吟無俗侶雅抱古人情

小酉洞簡王太守

搜奇西室遍摩挲未見藏書但薜蘿深谷尙餘三代俗白
雲遙憶穆主歌泉飛絕壁人蹤少林翳重岡鳥語多見說
使君饒著作胸藏二酉較如何

別熊巡按周督學二師羈於辰州均能以節義著

繡衣相對哭君親草野誰非名義人今日倉皇分手別移
家還傍首陽鄰

按湖南通志職官表不見熊周二入賴有此詩尙存其姓愈見當日紀載之缺畧也

吳節士愉

五首

愉字去佛善化人崇禎末貢生所居在城南古渡
故又號古渡嶼山先生道行子與弟愷俱以文行
顯獻城陷長沙匿巖谷中免乙酉闖賊餘黨犯瀏
陽長沙通守周公二南率衆禦去佛以參謀從行
與賊戰於官渡被繫不屈死附祀二忠祠有春雪
堂參帆樓諸集

憩嶽祠

新聲發黃鳥古道照危岑結想河山邈潛光草木深石巉
空欲語雲岫澹無心定入如相遇希微未可尋

飛來石畔拜先慈墓

石骨嶙峋轉雲阿曲折開飛巒侵几出遠水接天迴松頂

鶴方定崖前鹿不猜奠椒歌陟岵颯颯晚風催

岳陽樓

吞天灑氣撼波臣風雨維舟一愴神憂樂總餘千古淚乾
坤送老百年身許多往事餘三戶如此狂瀾奠幾人自歎
樓頭空徙倚欲從何處問迷津

望南撫至

熙平文物古湘川赤羽無端迫眼前疑寇疑兵蹤莫問如
歌如哭事驚傳先聲韓范能摧敵半壁東南可拄天幾許
居人後恐後關頭望氣駭風煙

尊經閣

空中樓閣蔽松櫺此日誰人問六經盡在水濤山色裏年

年芳草逼人青

吳季子傲 十三首

傲字去慵一字損庵善化縣學生嶼山先生季子
與兄愉齊名明季以明經薦未就鼎革後棄諸生
率妻子躬耕長松里屢聘不起高彙旃先生所云
志節矯然不愧謝臯羽黃東發一流人者也著有
古今日錄擬古樂府三異筆餘行園應草素履草
停雲錄懷霜錄諸書詩意簡鍊無淺率語

故池悲 有引

余世濱古渡門外隄橋委宛通湘浦樹木蒼古巖如由
谷有池二區一種魚一植蓮池旁構屋數椽堂廡亭樓

軒殿深遠頗擅林壑之勝先大人諫予兄弟叔姪讀書
其中好友時來賦詩飲酒麓山湘水遙相應酬國中人
莫不知為吳氏園池也予友胡三爾愷卜居河上蓬池
乞蓮以詩見貽曰君門臨清溪平地飛香雪江陵曹子
國樸過訪賦詩亦曰信步尋君路莫猜人言門對藕花
開喪亂以來國中父老猶有存者經予里亦莫不指顧
興歎是吳氏舊池園也近者感念先業小築自憇而荷
池竟為一公卒所據薄言往愬逢彼之怒予世外遺民
雅不欲以此細事煩上官且自愧嗟乎今三及秋矣例
以醵蕪新則亦應還我故物乃峴負如故世無知己誰
與質成憶先朝萬歷丁巳秋先大人撤故居而新之檢

所覆瓦中有至大元年謝公造七字按至大屬元武宗
號道明神宗時已三百二十有餘歲矣丙丁之際劉衡
麓先生歸休過晤先大人予兄弟侍顧相笑曰予每過
黃叔闇西墅多富貴氣不及君家山林本色使人情移
嗟乎先人做廬經營古渡歷有年所不幸遭劫鞠爲茂
草今且承平門外半畝爲之後者弱不克勢捫心浩歎
豈獨吾愛吾廬清秋月曉幽淚盈襟漫賦此詩無聊排
悶爾時癸卯七夕

昔家古渡頭因地成清築亭樓次第安林塘相倚伏有池
種菡萏四面香風撲葭菼鬱成林菱芡森滿目清鷗一來
過波紋盪綺縠好友時過從流連每信宿野外無供給嶽

翠與湘絲樂天池上亭杜老瀼西屋魚鳥共歌舞草木同
幽曠年來兵火仍到處榛莽簇驚心桑田海駭目神州陸
攘奪固其所凶暴誰敢觸今者漸承平綱紀亦已肅公然
肆凌暴何以安井牧主人前致辭彼狡肆詆誆曰世經亂
離故物誰克復驕橫方勢力欲語但局促忽逢故老來相
見額頰頰君世家此中誰敢肆予毒虎狐欲誰憑雀鼠不
足速再拜謝丈人誰能平此獄不見滄桑來閱世幾陵谷
立野重歎息質成非所欲歸來獨掩門長歌聊當哭

嶽麓讀斷巖殘句

春醉倚巉巖倒松挂飛壁虬結成隍光古色照人慄披荆
訪昔人苔蘚封斷石隱微數行字宛然鳥獸躋闕殘不著

代引泉拭且惜揣摩句得之老木識前輩回顧煙雲深洵
矣環鑿氣

夜雨思

夜如其夜未沈欲寐不寐轉孤衾轉孤衾誰共語推起
蓬窗聽夜雨

淶溪夜泊呈堵牧遊師

自注時備兵江黃余從遊

蒿目中原路縈懷此夜舟淚橫非繫別憤絕不成愁明月
淶溪樹長風赤壁流古人勛業在呼白為君浮

附錄牧遊先生手札時事如此天下事尙忍言哉
不佞提孤軍於上游莫為之應惟冀天地祖宗之
靈希圖一戰桑榆之收即鞠瘁致身夫復何恤異
日嶽麓江邊月明探夜有淒風遙渡便是堵子不
死之魂與故人一相見也門下荆猿忠孝高隱嚴
阿不愧理學後裔勉之哉勉之哉無忽片語致屬

千萬
留神

入武昌郡

猶是前遊處蕭然動旅情
習鷹驕坐逸殘雀舞風橫
板蕩羞書史安危感聖明
滔滔誰與易獨向月三更

憶家

草滿人煙斷波高漁葦逢
湖光生晚照山色變前峯
歷落鄉心切蒼茫客思慵
昨聞兵正逸休夏且姿供

杖遊

素心成獨往倚杖步溪光
野迳苔封亂山天秋氣蒼
鷺鷥迎宿好松菊破林荒
淅淅涼風起悠然思未央

春日同胡叔易陳東卿渡嶽麓

片帆偶挂泝瀟湘
楫擊中流引興狂
波雛練紋鷗篔簹
適林環雲繡鳥輿
忙閑餘泛鼓山陰
棹詩就酣添金谷觴
破浪乘秋看桂發
馮夷應自護輕航

寄胡三爾愷

閒關不惜返湘涯
野服蕭然幾歲時

自注愷原任太平司李丙戌歸隱誰

使鶴猿歌別怨頓
教邱壑笑歸遲
離亭晚笛橫煙迴
驛路新花暎馬馳
諫草數篇鄉思永
可憐謝取北山移

登嶽麓追和張越青兵憲

芝岡萬派趨湘勝
縹渺南天駐一峯
野艇橫波生浦意
林霞引日放山容
尋幽獨語溪邊石
習靜時聽嶺上松
卽目不堪尋往步
舊時巖谷遍扶筇

幾度名山問道鄉
怡然臺畔獨徜徉
露香花氣浮朝磬
釣影樵聲亂夕陽
古思每隨湖水闊
遺風誰激泗流長
自注朱張與教嶽麓世謂瀟湘有洙泗風
耽遊竟日忘歸去
乘興扁舟下碧湘

嶽麓憶胡叔易陳東卿戴小戴

層巒飛擁大江流
景物天南動客愁
惻惻寒生煙寺晚
悠悠雲帶遠帆秋
清泉滿耳巉巖裂
古木空心錯節周
寂寞故人俱不見
夕陽影裏獨登樓

嶽麓寺

光風澹宕嶽嵐新
結勝來探古寺春
林靜好音傳竹玉
樹深老衲坐雲茵
眼前古木參禪偈
象外功名入世因
更欲尋芳最高處
證明峯際未來身

米處士肇灝一首

肇灝字梁若一字大程辰溪人父助國字民和天
啟乙丑進士令江西龍泉時魏璫庄祠方熾撫按
檄下議建龍泉堅執不可璫敗朝廷徵立祠罪江
右獨無龍泉力也擢福建道監察御史出尙書畢
自嚴給事中章正宸於獄竟以是落職甲申後避
亂東山減食飲以自損卒大程貢生遭亂後遜居
城東五十里之椒溪自號椒溪處士所著有踞松

吟

椒莊

結舍依低阜開窗露小天羣松環短榻一徑羃荒煙草長

能辭客蟲吟足紀年塵心何處著倚石聽飛泉

吳孝子甯訥 一首

甯訥字正言善化縣學生痛父愉殉國難徒步號
泣於炎天烈日中覓遺骸躬自舁歸哀毀不食卒
人稱吳孝子

嶽望

衆壑秋將暝拋書眺晚雲松陰棲鶴子石路入鴉羣懸瀑
清難漱空山靜有聞兒孫看列岫歷歷望中分

米布衣元侗 十三首

元侗字吉人辰溪人民和侍御助國孫明末舉於
鄉鼎革後以布衣終有羅峯文集詩集十三卷詩

餘二卷晚年復棄去以講學名學者稱羅峯先生
羅峯生當亂世興廢之際潔身去就無愧學者善
古文詩亦不俗

書感

林表曙色開羣鳥風中作吾亦感時節默默坐高閣欲讀
古人書所託徒糟粕客至或笑言祇得須臾樂以此嘗躑
躑顧景已非昨東方既覆世彭澤愛獨酌二途既不同我
生何所著吁嗟賢達事方寸殷寥廓

傷旱

有引

今年旱甚饑患方殷因念昨歲頗豐耗於畜牧與旱何

異爲詩以俟採風者

原注先年癸巳故明將李定國攻陷寶辰諸郡

王師討之退武岡

家居古道上種田古道旁
暄寒感大化秋成千畝黃
詎意滇軍卒擇爲水草場
愛此禾稻好放馬看騰驥
朝食田中穀暮臥隴畝
荒餘粒肆狼藉極目何荒涼
農人誰敢問泣立原頭
霜溝塍粒無遺糞穢積如岡
昨往見阡陌寒水皓茫茫
古來重軍餉人馬資芻糧
吁嗟願窮閭切切忍饑腸

登小橫山

孑然立一山空中見標格
乘危行已竟巖徑去還窄
峯高石骨瘦天近雲光迫
終古無春來千年樹一尺
孤雲獨何心白日澹將夕
惴焉戒垂堂浩歌聊自適

哀滇中四十九人戰死瀘溪石橋

四十九人同許國一朝血
濺瀘江側江聲流血起
怒濤壯

汝叱咤風雲色殺身取義自古難鍊石爲心鐵爲肝事急
勇生厲風雨劍芒慘澹牛斗寒但有死者無降者鼎鼎烈
骨暴荒野血污遊魂歸去來冷風驚夢淚盈把

雨後書興

雨過雲初歇春深物正華忘年甘老病隨意問鶯花拄杖
何時出餘糧隨處家只愁烽火近難種故園瓜

望平山懷淨然上人

傍晚茆檐坐高枝見鳥還秋爭一片月人在幾重山書札
言相待風塵身未閑孤琴將遠意寥落白雲閒

夕坐

斜照遲遲下微風稍動林細蟲貪暮氣遠草接春心人語

空山寂猿歸古徑深卑棲身漸嬾終日罷鳴琴
晚寺疏鐘發寥寥入寂聽百年三月暮半壁一鐙青幽草
木多露高天獨有星薄寒思枕席夢裏亦泠泠

晚坐西園有懷

坐愛西園晚寥天過片雲暑消林氣薄涼定水光芬顧影
慚行止虛心理見聞客堂今夕夢一半是思君

界止亭

步急方思息閒亭倚石城怕來高處望忽使遠愁生柳氣
催溪綠松光掃路明爲留欲去侶共對萬峯晴

復從獺溪歸作

三年常作客幾日暫開顏野步不隨路秋愁多向山遠明

溪白動虛響樹常閑爲惜高雲意蹉跎未擬還

激浦道中

城已多時破村憐幾處存荒蹊春雨冷舊院野花繁白骨
經霜雪烏鴉長子孫故鄉戎馬徧對此哭黃昏

遊九崖

虛谷少人跡半山崩石聲無根藤自活應候鳥殊鳴疏樹
雲微出荒田虎數行歸途愁日暮秋色帶孤城

錢監紀點

一首

點字監濤本籍丹徒官監紀大錯和尚之猶子也
鼎革後流落湖湘占籍爲武陵人

補樵堂頭五十初度

善卷樓遲地金剛說法壇叢林三楚勝花雨一春寒具識
能通慧長生豈待丹新詩應自壽可寄老夫看

蕭隱君士熙三首

士熙字止庵衡山人明季兩中副榜鼎革後隱居
湘東烏塘足跡不出城市性警敏過目成誦嘗借
全史手自摘錄評論一載而就又搜錄古今節烈
事爲傳贊藏於家 國朝康熙初縣令王家賢聘
修邑乘半月輒脫稿詩不多見茲從方志採存古
近體詩三首清雅名雋儻然塵壒之外亦前明遺
老之有本末者不宜列之 本朝也

清涼寺古松 有引

郴州老友喻煨邦招坐其下講河圖洛書與宋儒所以
異者竟日因出陳白沙湛甘泉兩先生詩及講學要旨
相示作此紀之

大江迅終古梵宇開江陬遠岸迷長蘆沙齧見空洲老松
闕廢興葉深亂雲稠本意自離羣杳靄附層樓勞勞車馬
人對茲心魂幽我友郴山秀讀易蓮峯頭邵朱若陳蹟以
意說圖疇永日消百慮時聞蟬蛸歎孤影隔炎烈盛夏如
深秋一枝垂斷臂詰屈盤銀鉤引臂問寺僧不對但張眸
此君千古色文字非所求養壽局金室劉向知其由衆木
拱蒼鱗如嶽立陵邱虛廊真氣隱古煨異香浮陳湛兩夫
子登陟喜冥拶白沙出氛塵洞達信無儔甘泉友餘姚道

同各有謀振衣歷祝融曠然集眾流後先升講堂鄙邑成
魯鄒間吟高擊壤微言託和酬直幹恥牽附穆如兩公留
清磐發亭午空晴起颼颼香屑飯僧徧吹花無時休白雲
下嶽頂渡水將東遊愛此不能住餘溼絳龍虬踏歌歸月
上君聽江悠悠

按國初郴州老儒有喻國人前明壬午舉人著述極富見四庫存目此云殿邦或即其人也

南嶽別巖白注巖中有隱僧云自五台來

金幢瓊榜諸門遠黃飛幾葉秋山晚虹泉百道垂天半下
看漆梓珊瑚榦雁蕩雞足無碑版住山定有人姓阮出誦
珠零雄露歌歸餐香冷松花飯老向五臺腳未歇應愛此
中無日月鬱羅日月非人閒脂染春桃秋後發巖空曾住

王子喬青鳳騎飛雙鳥遙展具安禪成翠幙必逢仙令下
相招八十趙州身如木洞閉廿年無剝啄斜睨石榻起身
遲夜呼予鶴來同宿心知此君非避秦眼曠多似怪漁人
漁人已去雲深護星臺翠壁怯生塵未許南陽得問津

送曹易庵赴京謁選

秋風北向看舟竿浩浩湘江正早寒無計能寬鄉信迫有
誰長念子衣單騷推楚客猶堪反瑟到齊門莫妄彈自笑
張侯徒白首一生曾未夢長安

賀職方奇 一首

奇字庸也一字夫放武陵人明季拔貢授中書舍
人加兵部職方主事監察御史鼎革後祝髮峩峩

隱濱黔閒二十年 國初當事強加巾服具題
以原官起用未赴故仍列之明代以從其志

崔氏井

仙人每愛張虛白巧賺無如崔阿婆賒取武陵溪口醉換
來河湫酒泉多千年有跡勞碑碣古井無波長薜蘿若官
行吟同屈子應知獨醒不相過

裴秀才紹度

三首

紹度字又晉武陵諸生有集

遊桃川

迺邇訪桃川放眼欣所遇野色上孤舟蒼蒼梓里樹陰繁
積霞明歸雲愁日暮魚網挂沿溪清月照前路

甲寅避兵官山至安化黃茆洞見緣巖穴處兩三家
感賦

崇山峻嶺莽無限谿水瀠洄通一綫中有巢穴無懷民汚
樽杯飲土風便懸巖倒壁棲雞豚刀耕火種樂畚佃日月
惟知父子親飲食不厭交遊賤今來避亂離鄉縣裏糧鹵
莽踏蒼蘚羨爾風景人世殊不識兮黃有征戰

和天放先生糴穀韻

楚援亡去三千里遼鶴歸來十八年三徑就荒逢客至高
齋日午未炊煙

陳秀才國器八首

國器武陵諸生

落葉

榮落相尋自往還時當剝落豈容閑
早從白露通秋耗一任西風造大艱
山到晚來先欲睡月臨愁地總無顏
寒威獨詘青天上遙指榆花未可攀

自是芳菲愧漆膠霜娥紅淚灑寒梢
意中天女舊羅襪眼底美人新髡髻
到得色衰同一擲誰堪情斷即輕拋
林端無限傷心景莫怪鸞皇不定巢

晏歲終無雨露膏瘁容自分委蓬蒿
青要乍可彌猜忌少女何為更怒號
萬里西風連北渚橫空幽怨下亭皋
劇憐抱蒂微陰處似語松筠慎節操

謾說珠宮別物華經年不散古煙霞
由來雨蝕風饕後那

得紅芳綠豔誇秋到
瑶林同剝落氣窮晚節豈萌芽唯餘
五柳先生宅開徧東籬黃菊花

卽有寒英坼晚香瓊
枝終是怨江郎秋隨枯碧千聲落天
斷殘英一夜荒乍入草間埋蟋蟀難從水面覆鴛鴦踏歌
莫唱陽春曲唱到陽春轉斷腸

琅琊大道已塵生
銷歇芳華倍感情白草黃沙羅漢冢蕭
風寒水送荆卿空懷珠絡陽春鼓忍聽烏嗁夜月聲落日
青山紅樹裏最關心是庾蘭成

偶向天邊賦遠遊
驚從枯樹感深秋可容寫怨隨流水未
必通言效蹇修金谷已空深步障秦關偏點做貂裘誰家
折柳生長笛似爲愁人喚莫愁

司馬攀條別怨含樹猶如此我何堪十年雨露英雄淚前
日風流老大慚空睹蟲書呈幻字總歸蓮火供彛談無情
有憾誰能遣今古閒愁與共參

陳秀才逸

二首

逸原名穎武陵諸生有石函集

瓜田

薄田傍山麓別類列疏畦細雨引長蔓衆草亦已蕪戒心
去非種行鋤使之齊綠離遙一色枕結無端倪抱膝坐林
石雲起衣裳迷日永靜悠悠山深寂鳥嘯安知與年長流
亡愧蒸黎

移家湖上

水漲平湖白鷺飛
寒蘆開葉野魚肥
半閒茆屋新環堵
一縷孤煙依舊歸

闕遺民間二首

聞字令聞桃源人崇禎末貢生有舌隱集

辭召

聞也朽匹夫不材等櫟樗三十學擊劍慷慨慕相如感時
上萬言厥志在埽除一進開府策兩上宰相書數戰洞庭
波再驅衡岳驢下第傷別足三北增歛歔厥矛惟小拔意
將用其餘忽忽滄桑幻耕彼南山畚家難倏傷心父喪母
亦徂姊弟繼之逝奄化及卵雛一苧手殘編骨立似山狙
嗟哉蒿蔚子焉得擬彼姝郵使忽南來懷出雙鯉魚云自

邑使君捧之起躄踏豈曰追呼迫我田荒不租開函急捧
讀當宁飛干旗請君早著鞭及此安輿蒲聞也載拜跪輾
然起長呼千里走騏驎甯顧鴛與駒高岡鳴鳳皇何事鶉
與鳩嗟嗟賤貧子 聖明安所須而我又棘人苦塊坐瞿
瞿况多病中之稿形類澤曜不聞陶家子田野荷犁鋤不
聞東臯生河渚狎雁鳧野人非蚌母敢矜懷中珠以知大
度朝詢不及樵漁願守篋笠躬畢命黃與虞請謝大夫喬
甚勿罪狂且

訪懿山師於芭蕉寺

山裏尋山煙樹昏綠天深處一庵存石頭路滑甯辭杖玉
版枝橫敢叩門燒筍悅禪誰解味聞樨到座已忘言蕉心

不惜層層剝摘向機鋒舌上翻

陳湮民長瑞三首

長瑞字伯五湘潭人諸生嘗受業周伯孔鼎革後
自號湮民又號楚州酒人著有石竹園初刻浪石
近詩伯孔之死傳聞異詞劉賓門先生曾力辨其
寃余亦思有作以無確然左證而止此集將成乃
從一舊家蒐得伯五詩稿中有挽伯孔詩伯五親
受業帙闕斷無自誣本師之理乃歎才士處亂世
委蛇觀變鮮有能自全者錄詩至此爲之巨歎

浪石答唐質生

山棲畢竟好俗近古皇初深逕常通鹿寒溪不載鴈下田

宜種秣春囊欲澆書寂寞江南地誰同此做廬

輓周伯孔師有引

癸未六月獻逆陷長沙先生棄家入獄賊必欲得之移
文族其家始以病見是年五日集公安袁千子及唐質
生輩偕瑞泛舟江潭明日各散去竟以是爲永訣也

記別湘江一水濱榴花爛漫點衣巾離亂扁舟漂斷梗須
史高會泣靈均儒冠不諒生辭漢碧血堪憐夜化燐語不
驚人禍不烈千秋正氣只孤臣

自注時袁公安
浮家避亂湘干

偶於浙中洪廷錫手篋見周景虞先生近詩感而作
未亡人在諸緣斷脂粉消除遣嫁時北岸買舟衝雪早南
樓醉月倚欄遲廿年苦憶詩千首四海難棲樹一枝爲道

江南多戰骨可憐比戶憶王師

女士

潘耀卿妻賈氏一首

賈氏沅陵人文學賈澗之女讀書知大義適同邑
諸生潘耀卿隨夫省父業於南都至湖口夫病卒
氏欲赴水女奴累護持之抵建康見舅姑痛哭堂
下卽入以內自縊馳救得免乃絕食累日潛勿死
遺詩一絕

決絕詞

拋棄殘生思不禁可憐死別倍傷心
雙魂杳杳今何處化作嘯鵲返故林

古烈女一首

烈女不知名姓或云姓古或曰非也以古墓故遂
譌爲古姓也常德府志載鼎州江畔古墓相傳江
漲浮女尸洄旋隄下不去漲落停沙上數日面色
如生居人異而斂之一手猶握小卷取出開視縛
絹片血書詩一首咸驚歎曰烈婦也奈何不留姓
氏遂厚斂擇高原葬之勒詩於石歲久墓圯石漫
滅乾隆末大庾楊宗岱鈍夫主講朗江時曾採其
事作離騷影傳奇其詩遂盛傳於時

血書詩

潔守深閨十九春豈期竟作虜囚身夫生未補君王事妾

死甯忘夫婦倫夜靜自甘沈弱質月明那管弔亡人恩深
父母終難慰願作兒身來世親

湘陰女子 二首

女姓名逸長沙府志載其題壁詩二首

題壁詩

記得當年別後妝楚天一帶水茫茫春容消盡渾閒事怕
向籬邊摘海棠

終年不斷佛前香願祝夫人壽未央那敢專房稱冠寵開
箱惟取舊衣裳

按完顏輝氏閨秀正始續集作湘揚女子新城三
家店題壁有序并附錄家本維揚系出湘楚幼弄
章句長嫻詩詞感公子之情重矢白首以同歸憤
彼婦之肆譏竄綠衣于異域茹荼嘗藥曾刺血寫

經願結來世之緣歷暑徂寒惟孤燕征鴻共續中
宵之怨宛其心碧死亦宜然時見葉紅生則徒爾
乃幸鷓鴣羹之什化彼閨中多使之章得專闕外般
勤釋使正值折梅奔瘡僕夫欣如御李偕予父母
骨肉而三及彼朋從男婦共七盼都門在日慰此
悽魂感往事關心深予縻淚但得安小星之常數
印已荷夫人之深恩遠非托小青氏之荒唐近竊
羞會稽女之怨懟庶幾君子憐我不知穢陋之章
風人有心採入
金閨之秀云爾

郭純貞 十首

純貞益陽人些庵先生都賢女性聰慧善詩詞些
翁愛之許字黔國公沐天波子國變後滇黔路梗
沐子不知所往久之音耗遂絕純貞守志終身自
題所居曰郭貞女廬後爲尼易名聯本結廬浮邱
山下曰卓庵年八十餘始卒嘗析驛梅驚別意堤

柳暗傷情十字賦閨怨十首競傳於時詩離合字
體有乖六書以其悲吟苦思得夫情之正者又些
翁女也故存之

閨怨十首

馬蹏踏破板橋霜四顧無人暗幾腸幸有香魂縈妾夢驛
門深鎖五更牀

木蘭初發送雲羈人去南州路幾千毋謂滇池迷雁跡梅
花傳信待君還

苟道相期一拙歸文光遙映美人衣馬嘶牆外君何去驚

起嫦娥淚暗飛

原注首句怨其父之輕於議婚也

口裏嗟君夢裏逢力窮無路訴蒼穹刀環在手憑誰贈別

後春愁畫掩宮

立傍閒亭捫翠鈿日君曰妾兩相牽心懷夢滿渾如醉意
擬春蠶已再眠

土圭測晷度林斜日泊西山起嘆嗟是影是真俱是幻堪
楊高噪暮投鴉

木落山空向晚秋夕陽歸雁過南樓耳邊不聽真消息柳
絮紛紛弄黑頭

日漸西馳事漸遐立盟空復待年華音書一斷魚沉海暗
地思君哭落花

人間何必辨春秋人死人生總是愁易理既明休問卜傷
心惟聽淚珠流

心中眷戀君知我主意同然我與君青鳥已空雲外信情
牽終是總無聞

按些翁兩女一適羅一字徐俱早拋均見集中純
貞詩豔稱於時果有其人些翁集中豈得無一言
以其相傳已久始仍方志存之

些翁妾某氏 一首

些翁妾談者忘其姓亦未見集中早歲嘗聞鉅野
君誦其詩蓋得之益先輩傳述今罕有能言之者
矣

爲些公下髮口占

鶴髮蕭蕭皆妾難須眉表表與君留情根永斷無絲蒂頑
石空摩便點頭禮樂尙思周制度衣冠誰問漢風流曾記

昔人詩一句枉帶儒冠學楚囚

案些公逃僧後始號頑石其下髮在丙戌六月有丙戌六月初二下髮文見本集二十九卷是時唐桂二王相繼稱號疆場彼此麻沸無常我朝雖髮之令猶未下也

譚德慧一首

德慧茶陵人信芝之女年十六鄱縣賊犯州境舉家走避未知女獨留閨中也賊至女懼辱投宅前池水死有絕命詞畱衣襟中時崇禎甲申三月也

絕命詞

側聞虜騎日悠悠骨肉分離祇自謀所憾未能酬罔極慈闈有淚灑清流

沅湘耆舊集卷第四十二終